

四庫全書

子部

欽定四庫全書

冊府元龜卷二百三十三 宋 王欽若等 撰

僭偽部

好土功 悔過 矜大 失策

好土功

一馬化龍劉石猾夏土功競起版築相誇雖金碧以輝
煌寔塗膏而潤血務極奢僭弗率典常通晝夜以黃功
雜寶玉以加飾鼓鐘未息荆棘旋生凶恣之蹤蓋可醜

也

前涼張茂築靈鈞臺周輪八十餘堵基高九仞武陵人
閻曾夜叩門呼曰武公遣我來曰何故勞百姓而築臺
乎姑臧令辛巖以曾妖妄請殺之茂曰吾信勞人曾稱
先君之令何謂妖乎

張駿西域鄯善王元孟獻女號曰美人駿立賓遐觀以
處之

前趙劉曜命起鄧明觀立西宮建凌霄樓於瀉池於霸

陵西南營壽陵侍中高豫和苞上疏曰臣聞人主之興作也必仰準乾象俯順人時是以衛文承亂亡之後宗廟流漂無所而猶上候營室以構楚宮彼其急也猶尚若茲故能興康叔武公之迹以延九百之慶今奉詔書將營鄴明觀市道芻蕘咸以非之曰一觀之費足以平涼州矣又奉勅旨復欲擬阿房而建西宮模瓊樓而起凌霄以此功費亦可以吞吳蜀翦齊魏矣曜大悅

後趙石勒將營鄴宮廷尉續咸上書切諫勒大怒曰不

斬此老臣朕宮不得成也勅御史收之中書令徐光進
曰陛下天資聰睿超邁唐虞而更不欲聞忠臣之言豈
夏癸商辛之君邪其言可用用之不可用故當容之奈
何一旦以直言而斬列卿乎勒嘆曰為人君不得自專
如是豈不識此言之忠乎向戲之耳人家有百匹資尚
欲市別宅况有天下之富萬乘之尊乎終當繕之耳且
勅停作成吾直臣之氣也時大雨霖中山西北暴水流
漂巨木百餘萬根集於堂陽勒大悅謂公卿知不此非

為災也天意欲吾營鄴都耳於是令少府任汪都水使者張漸等監營鄴宮勒親將規矩

石季龍於襄國起大武殿於鄴造東西宮大武殿基高二丈八尺以文石絳之下宮伏室置衛士五百人於其中東西七十步南北六十五步皆漆瓦金鎗銀楹金柱珠簾玉壁窮極伎巧又起靈風臺九殿於顯陽殿後選士庶之女以充之後庭服綺縠玩珍奇者萬餘人內置女官十有八等教官人星占及馬步射置女史太史於

靈臺仰觀災祥以考外太史之虛實又觀雀臺崩殺典
匠少府任汪復使脩之倍於常度又盛興宮室於鄴起
臺觀四十餘所營長安雒陽二宮作者四十餘萬人又
發雍雒秦并州十六萬人及安未央宮時沙門吳進言
於季龍曰國運將衰晉當復興宜苦役人以厭其氣季
龍於是使尚書張羣發近郡男女十六萬車十萬乘運
土築華林苑及長牆於鄴北廣長數十里趙攬申鍾石璞
等上疏陳天文錯亂蒼生凋敝及因引見又面諫辭旨甚

切季龍大怒曰牆朝成夕沒吾無恨矣乃促張羣以燭夜作三觀四門三門通漳水皆為鐵扉暴風大雨死者數萬人又鑿城北引水於華林園城壞壓死者百餘人南燕慕容熙大築龍騰苑廣袤十餘里役徒二萬人起景雲山於苑內基廣五百步峯高十七丈又起逍遙宮甘露殿連房數百觀閣相交鑿天河渠引水入宮又為其昭儀苻氏鑿曲光海清涼池季夏盛暑士卒不得休息暍死者大半又起承華殿負土北門土與穀同價

後涼李暠於南門外臨水起堂名曰靖恭之堂以議朝政又起嘉納堂於後園

悔過

書重改過勿吝語稱過而能改不遠之復聖哲攸許乃有據有方隅竊居位號鑄柄在手慘舒所繫故窮極武力放肆淫志詔令一出國命是司則有忠臣奮發嘉謨啓沃雖雄鷲之勢必需然回慮盈於感歎革其非心至乎錫幣加號以旌厥功茲所以用區區之國能守其社

稷者矣

前涼張茂為涼州牧歲餘築靈鈞臺周輪八十餘堵基
高九仞武陵人闔曾夜叩門呼曰武公遣我來曰何故
勞百姓而築臺乎姑臧令辛巖以曾妖妄請殺之茂曰
吾信勞人曾稱先君之令何謂妖乎大府主簿馬魴諫
曰今世難未夷惟當弘尚道素不宜勞役崇飾臺榭且
比年已來轉覺衆務日奢於往每所經營輕違雅度實
非士女所望於明公茂曰吾過也命止作役

張駿性卓越不羈而淫縱過度常夜微行於邑里國中
化之及嗣位為涼州牧欲嚴刑峻制參軍黃斌進諫駿
於是厲操改節勤脩庶政總御文武咸得其用

前趙劉聰為皇后劉氏起鷄儀殿於後庭廷尉陳元達
諫聰大怒將出斬之時在逍遙園李中堂元達先鎖腰
而入及至即以鎖繞樹左右曳之不能動聰怒甚劉氏
時在後堂聞之密遣中常侍私勅左右停刑於是手䟽
切諫聰乃解引元達而謝之易逍遙園為納賢園李中

堂為愧賢堂

後趙石勒時從事中郎將劉奧坐營建德殿井木斜縮
斬於殿勒悔之贈太常勒將狩於近郊主簿程琅諫曰
劉馬刺客離布如林變起倉卒帝王亦一夫之敵耳孫
策之禍可不慮乎且枯木朽株盡能為害馳騁之弊古
今戒之勒勃然曰吾幹力自可足能裁量但知卿文書
事不須白此輩也是日逐獸馬觸木而死勒亦幾殆乃
由不用忠臣言吾之過也乃賜琅朝服錦絹爵關內侯於

是朝臣謁見忠言競進矣勒命參軍鼂讚成正陽門俄而門壞勒大怒斬讚既怒刑倉卒尋亦悔之賜以棺服贈大鴻臚

冉閔率步騎十萬攻石祗於襄國署其子太原王裔為大單于驃騎大將軍以降胡一千配為麾下光祿大夫韋諛啓諫甚切閔覽之大怒誅諛及其子孫後閔悔之贈諛大司徒

前燕慕容皝以牧牛給貧家田於苑中公收其八二分

入私有牛而無地者亦田苑中公收其七三分入私記
室叅軍封裕切諫曰聖王之宰國也薄賦而歲於百姓
分之以三等之田十一而稅之自永嘉喪亂百姓流亡
中原蕭條千里無煙且魏晉雖道消之世猶削百姓不
至於七八持官牛田者官得六分百姓四分私牛而官
田者與官平分百姓安之臣猶曰非明王之道而况增
乎又諫曰王憲劉明忠臣也願宥忤鱗之愆收其藥石
之效孰乃令曰覽封記室之諫孤實懼焉苑囿悉可罷

之以給百姓

前秦苻堅銳意荆揚將謀入寇其左僕射權翼征南大將軍苻融沙門道安與其太子宏少子詵等諫皆不納堅為晉師所敗又為流矢所中單騎遁還淮北饑甚人有進壺飧豚髀者堅食之大悅曰昔公孫豆粥何以加也命賜帛十疋絲十斤辭曰臣聞白龍厭天池之樂而見困豫且陛下目所覩也今蒙塵之難豈自天乎且妄施不為惠妄受不為忠陛下臣之父母也安有子養而求

報哉弗顧而退堅大慙顧其夫人張氏曰朕若用朝臣
之言豈見今日之事邪當何面目復臨天下乎潛然流
涕而去自淮南次於長安東之行宮哭苻融而後入告
罪於其太廟厲兵課農存恤孤老諸士卒不返者皆復
其家終世贈融大司馬謚曰哀公及姚萇主盟遣尹緯
說堅求禪代之事堅問緯曰卿於朕何官緯曰尚書令
史堅歎曰卿宰相才也王景畧之儔而朕不知卿亡也
不亦宜乎

後秦姚興以赫連勃勃為安遠將軍以部衆三萬配之弟邕固諫以為不可後勃勃僭稱天王侵畧嶺北諸城門不晝啓興歎曰吾不用黃兒之言以至於此黃兒姚邕小字也

南涼禿髮利鹿孤時乞伏乾歸為姚興所敗率騎數百來奔處之晉興待以上賓之禮鎮北將軍俱延言於利鹿孤曰乾歸本我之屬國妄自尊立理窮歸命非有款誠若奔東秦必引師西侵非我利也宜徙於乙弗之間

防其越逸之路利鹿孤曰吾方弘信義以收天下之心
乾歸投誠而徙之四海將謂我不可以誠信託也俄而
乾歸果奔於姚興利鹿孤謂延曰不用卿言乾歸果叛
卿為吾行也延追乾歸至河不及而還

秃髮儁檀利鹿孤弟也既襲偽位將率衆攻北涼沮渠
蒙遜太史令景保諫以天文不順難以伐人儁檀不聽
果大敗景保為蒙遜所擒讓之曰卿明於天文為彼國
所任違天犯順智安存乎保曰臣匪為無智但言而不

從蒙遜乃免之至姑臧偁檀謝之曰御孤之著龜也而不能從孤之深罪封保安亭侯

矜大

君臣之序邦家之大倫也逆順之理存亡之要道也夫以王政不綱姦臣擅命挾桀黠之小智幸傾圮之大災謂神器可以力移以天命在乎已有去順效逆以臣代君借使懼而思危民猶弗與矧乃硜然自滿亡於何逃以神禹之茂功而納誨於矜伐以宣尼之上聖而見戒

於驕奢况茲醜德自蹈禍機有一於斯不敗奚待

前涼張駿為涼州牧得玉璽於河其文曰執萬國建無極時駿盡有隴西之地士馬強盛雖稱臣於晉而不行中興正朔舞六佾建豹尾所置官僚府寺擬於王者而微異其名又分州西界三郡置沙州東界六郡置河州王府官僚莫不稱臣又於姑臧城南築城起謙光殿畫以五色飾以金玉窮極珍巧殿之四面各起一殿東曰宜陽青殿以春三月居之章服器物皆依方色南曰朱

陽赤殿夏三月居之西曰政刑白殿秋三月居之北曰
玄武黑殿冬三月居之其傍皆有直省內官寺署一同
方色及末年任所遊處不復於四時而居

後趙石勒僭即帝位因饗高句麗宇文屋孤使酒酣謂
中書令徐光曰朕方自古開基何等主也對曰陛下神
武籌畧邁於高皇雄毅卓犖超絕魏祖自三代以來無
可比也其軒轅之亞乎勒笑曰人豈不自知卿言亦以
太過朕若逢高皇當北面而事之與韓彭競鞭而爭先

耳脫遇光武當並驅於中原未知鹿死誰手大丈夫行事當磊磊落落如日月皎然不能如曹孟德司馬仲達父子欺他孤兒寡婦狐媚以取天下也朕當在二劉之間耳軒轅豈所擬乎其羣臣皆頓首稱萬歲

前秦苻堅僭即天王位引羣臣會議伐晉太子左衛率石越進言不可堅曰昔夫差威凌上國而為勾踐所滅仲謀澤洽全吳孫皓因三代之業龍驤一呼君臣面縛雖有長江其能固乎以吾之衆旅投鞭於江足斷其流

後秦姚興僭即天王位時潁川太守姚平都自許昌來朝言於興曰劉裕敢懷姦計屯聚芍陂有擾邊之志宜遣燒之以散其衆謀興曰裕之輕弱安敢窺吾疆場苟有姦心其在子孫乎召其尚書楊佛嵩謂之曰吳兇不自知乃有非分之意待至孟冬當遣卿率精騎三萬焚其積聚嵩曰陛下若任臣以此役者當從肥口濟淮直趨壽春舉大衆以屯城縱輕騎以掠野使淮南蕭條兵粟俱了足令吳兇俯仰回惶神爽飛越興大悅

後蜀李壽僭即帝位其將李宏自晉奔於石季龍壽致書請之題曰趙王石君季龍不悅付外議之多有異同中書監王波議曰本李宏以死自誓若得反魂蜀漢當鳩率宗族混同王化若遣而果也則不煩一旅之師而坐定梁益就有進退豈有逃命一夫壽既號並日月跨僭一方今若制詔或敢酬反則取誚戎裔宜書答之并贈以楛矢使壽知我遐荒必臻也於是遣宏備物以酬之宏既至蜀漢壽欲誇其境內下令云羯使來庭獻其

楛矢季龍聞之怒甚黜王波以白衣守中書監

北凉沮渠蒙遜僭稱河西王下書曰古先哲以應期撥
亂者莫不經畧八表然後光闡淳風孤雖智非靖難職
在濟時而狡虜侮檀鴟峙舊京毒加夷夏東苑之戮酷
甚長平邊城之禍害深獫狁每念蒼生之無辜是以不
遑啓處身疲甲冑體倦風塵雖傾其巢穴侮檀尚未授
首侮檀弟文支追項伯歸漢之義據彼重藩請為臣妾
自西平已南連城繼順惟侮檀窮獸守死樂都四支既

落命豈久全五緯之會已應清一之期無餘方散馬金山
黎元永逸可露布遠近咸使聞知

夏赫連勃勃僭稱天王大單于時姚興鎮北叅軍王買
得來奔勃勃謂買得曰朕大禹之後世居幽朔祖宗重
暉常與漢魏為敵國中世不競受制於人逮朕不肖不
能紹隆先構今將應運而興復大禹之業卿以為何如
買得曰自皇晉失統神器南移羣雄嶽峙人懷問鼎况
陛下奕葉載德而不建成大業乎

蜀王建陳州項城人唐末隸名於忠武軍秦宗權據秦州懸重賞以募之建始自行間得補軍候廣明中黃巢陷長安僖宗幸蜀時梁祖為巢將領衆攻襄都宗權遣小校鹿晏弘從監軍楊復光率師攻之建亦預行是歲復光入援京師明年破賊收京城初復光以忠武軍八千人立為八都晏弘與建各一都校也復光死晏弘率八都迎扈行在至山南乃攻剽金商諸郡縣得兵數萬進逼興元節度使牛勣奔城而去晏弘因自為留後以

建等為屬郡刺史不令之任俄而晏弘正授節鉞恐部下謀已多行忍虐由是部衆離心建與別將韓建友善晏弘益猜二建偽待之厚引入卧内二建懼夜登城慰守陴者因月下共謀所向謂韓建曰僕射甘言厚意疑我也禍難無日矣早宜擇利而行韓曰善因率三千人夜遁而去

閩王昶天福四年十月庚戌昶威武軍節度使王繼恭使僚佐鄭元弼來朝貢其方物致書於執政曰閩國一

從興建久歷年華見北辰之星位頻移致東海之風帆
多阻願言遐想文不逮誠餘遣郎吏林恩列狀申述壬
子詔曰朕仰承天命肇啓帝圖黃屋非尊蒼生在念旰
食宵衣而脩庶政推恩示信以御萬方要荒未綏責躬
勤止誕慕文德不憊夙心乃瞻甌閩素惟藩翰王昶昨
脩傾向來效貢輸朕亦釋以前非待之厚禮越羣方之
常例崇列國之真風爰及繼恭並昇方伯不謂恃其險
阻肆彼僭差矯誣上天狎侮君子左散騎常侍盧損等

泛舟海陽持節遐陬王昶自大自尊不迎不見寢停詔
命脅辱使臣遣鄭弼再詣闕庭使林恩別陳狀訴隳君
臣之事體希書札以往來悖禮慢言長無畏忌朕顧惟
寡昧虔賀景靈所患德之不修豈慮人之未服然以失
道憊義引惡紊常神祇之心憤怒俱至是用懲其跋扈
何須振以威刑鄭元弼等處此亂邦懼茲虐政諒非獲
已良可哀矜宜令所司切加安撫所齎文字及諸貢物
不在通進并諸州綱運等勒林恩鄭元弼管押速歸兵

部員外郎李知損等奏曰王昶僭踰名器嫚瀆朝廷雖
天罰之未行在國章而當正所頒詔命過示寬恩且匹
夫犯法之賊尚猶徵納而遐裔不臣之物豈可放還伏
請禁錮來人籍沒綱運帝可其奏林恩等即時下獄

前蜀王衍襲父建偽位後唐莊宗同光二年七月遣戶
部侍郎歐陽彬朝貢稱大蜀皇帝上書大唐皇帝書詞
旨驕怠三年八月戊辰客省使李巖使蜀迴初帝令巖
市蜀中珍玩蜀法嚴峻不許竒貨東出其許市者謂之

入草物嚴不獲珍貨歸而奏之帝大怒曰物歸中夏者
命之曰入草王衍寧免為入草之人耶繇是伐蜀之意
銳矣

後蜀孟知祥後唐末帝清泰元年鳳翔進知祥來書稱
蜀皇帝獻書於大唐皇帝且言見迫羣情以今年四月
十二日即帝位帝不答

漢劉陟僭稱於廣州改名襲又改名龔

龔讀為儼古文
無此字蓋妄撰

也每對北人自言家本咸秦恥為蠻夷之主又呼中國

帝王為洛州刺史其妄自尊大皆此類也

失策

昔西晉之末羣胡亂華分裂土宇竊僭名號然而習獷悍之性當百六之會恃彼強暴大為虐害復太史之切諫遽寘于刑感術士之狂言以至於敗棄人貴畜失河湟之奧壤背信殺降致巴氐之盡叛遂使士女塗於原野耕桑鞠為榛莽國祚短促覆於旋踵良有由哉

前趙劉曜僭立其長水校尉尹車謀反潛結巴酋徐庫

彭曜乃誅車囚庫彭等五千餘人於阿房將殺之光祿大夫游子遠固諫曜不從子遠叩頭流血曜大怒幽子遠而盡殺庫彭尸諸街巷之中十日乃投之於水於是巴氏盡叛推巴氏歸善王句渠為主四氏羗氏巴羯應之者三十餘萬關中大亂

後趙石勒僭位既得三臺乃以石季龍為魏郡太守鎮鄴三臺季龍篡奪之萌兆於此矣石季龍僭立將伐燕天竺佛圖澄進曰燕福德之國未可加兵季龍作色曰

以此攻城何城不克以此衆戰誰能禦之區區小豎何所逃也太史令趙攬固諫曰燕地歲星所守行師無功必受其禍季龍怒鞭之黜為肥如長進師攻棘城旬餘不尅燕王慕容皝遣子恪率胡騎二千晨出挑戰諸門皆若有師出者四面如雲季龍大驚棄甲而遁

冉閔僭立其將胡睦孫威為石琨所敗士卒畧盡睦威單騎而還琨等軍且至閔將出擊之衛將軍王泰等曰窮寇狂迷希望外援今強救雲集欲吾出戰腹背擊我

宜固壘勿出觀勢而動以挫其謀今陛下親戎如失萬
全大事去矣請慎無出臣請率諸將為陛下滅之閔將
從之道士法饒進曰太白經昴當殺胡王一戰百尅不
可失也閔攘袂大言曰吾決矣敢諫者斬於是衆盡出
戰姚襄悅綰石琨等三面攻之石祗衝其後閔師大敗
閔潛於襄國行宮與十餘騎奔鄴降胡栗特康等執冉
裔及左僕射劉琦等送於祗盡殺之司空石璞尚書令
徐機車騎胡睦侍中李紉中書監盧諶少府王鬱尚書

劉欽劉休等及諸將士死者十餘萬人於是人物殲矣
賊盜蜂起司冀大饑人相食自季龍末年而閔盡散倉
庫以樹私恩與羌胡相攻無月不戰青雍幽荊州徙戶
及諸氏羌胡蠻數百餘萬各還本土道路交錯互相殺
掠且饑疫死亡其能達者十有二三諸夏紛亂無復農
者閔悔之誅法饒父子支解之

前秦苻堅既為晉師所敗諸軍悉潰惟慕容垂一軍獨
全堅以千餘騎赴之垂子寶欲殺堅垂不從乃以兵屬

堅收離散比至雒陽衆十餘萬百官威儀軍容粗備未
及關而垂有貳志說堅請巡撫燕岱并求拜墓堅許之
權翼固諫以為不可堅不從尋懼垂為變悔之遣驍騎
石越率卒三千戢鄴驃騎張蚝率羽林五千戍并州留
兵四千配鎮軍蚝當戍雒陽後衛軍從事中郎丁零翟
斌反於河南長樂公并付丕遣垂及苻飛龍討之垂南結
丁零殺飛龍盡坑其衆遂叛

後秦姚興僭立使中軍姚弼後軍斂成鎮遠乞伏乾歸

等率步騎三萬伐禿髮儁檀左僕射齊難等率騎二萬討赫連勃勃吏部尚書尹昭諫曰儁檀恃遠輕敢違逆宜詔蒙遜及李玄盛使自相攻擊待其斃也然後取之此卞莊之舉也興不從勃勃退保河曲弼濟自金城進拔昌松長驅至姑臧儁檀嬰城固守出奇兵擊弼弼敗退據西苑興又遣衛大將軍姚顯率騎二萬為諸節度至高平聞弼敗績兼道赴之撫慰河外率衆而還儁檀遣使人徐宿詣興請罪齊難為勃勃所擒後禿髮儁檀獻

興馬三千匹羊三萬頭興以為忠於已乃署偃檀為涼州刺史王尚還長安涼州人申屠英等二百餘人遣主簿胡威詣興請留尚興弗許引威見之威流涕謂興曰臣州奉國五年王威不接銜膽棲冰孤城獨守者仰恃陛下威靈俯仗良牧惠化忽違天人之心以華土資狄若偃檀才望應代臣豈敢言竊聞乃以臣等貿馬三千匹羊三萬口如所傳實者是為棄人貴畜苟以馬供軍國直煩尚書一符三千餘家戶輸一匹朝下夕辦何故

以彼方華土委此姦胡昔漢武傾天下之資開建河西
隔絕諸戎斷匈奴右臂所以終能屠大宛王毋寡今陛下
方布政玉門流化西域奈何以五郡之地資之獫狁忠
誠華族棄之虐虜非但臣州里塗炭懼方為聖朝旰食
之憂興乃遣西平人車普馳止王尚又遣使喻偃檀會
偃檀已至姑臧普以狀先告之偃檀懼脅遣王尚遂入
姑臧

後涼呂纂既僭位將伐禿髮利鹿孤中書令楊穎諫曰

夫起師動衆必參之天人苟非其時聖賢所不為禿髮
利鹿孤上下用命國未有釁不可以伐宜繕甲養銳觀
課農殖待可乘之機然後一舉蕩滅比年多事公私罄
竭不深根固本恐為患將來願抑赫斯之怒思萬全之
筭纂不從度浩疊河為鹿孤弟偃檀所敗

後蜀李雄僭位初楊難敵之奔葭萌也安北李稚厚撫
之縱其兄弟還武都難敵遂恃險多為不法稚請討之
雄遣中領軍瑒及將軍樂次費他李乾等繇白水橋攻

下辨征東李壽督瑄弟玠攻陰平難敵遣軍拒之壽不
得進而瑄稚長驅至武街難敵遣兵斷其歸道四面攻
之獲瑄稚死者數千人瑄稚雄兄蕩之子也雄深悼之
不食者數日言則流涕深自咎責焉

冊府元龜卷二百三十三

欽定四庫全書

冊府元龜卷二百三十四 宋 王欽若等 撰

僭偽部

兵敗

兵法云賢智不用上下不親賞罰不當勞逸無別覘候
不審竒正不分此敗之道也若乃乘亂投隙僭竊名器
日恃於武力爭勝於危事於是徇佳兵之志犯黷武之
戒封執獨見斥去忠言以至昏醉而御戎誅殺以徇衆

繇此喪衆至於失邦者蓋本無德義輕肆倔强自速其咎非不幸也易所謂投戈散地六親不能相保者良謂此哉

前涼張駿自稱涼州牧遣武威太守竇濤金城太守張閭武興太守辛巖揚烈將軍宋輯等率衆東會將軍韓璞攻討秦州諸郡時劉曜遣其將劉喬來拒屯於狄道城韓璞進度沃千嶺辛巖曰我握衆數萬藉氐羌之銳宜速戰以滅之不可以久久則變生璞曰自夏末以來太白

犯月辰星逆行白虹貫日皆變之大者不可以輕動輕動而不捷為禍更深吾將久而斃之且曜與石勒相攻裔亦不能久也積七十餘日軍糧竭遣辛巖督運於金城裔聞之大悅謂其諸士曰韓璞之衆十倍於吾羌胡皆叛不為之用吾糧廩將懸難以持久今虜分兵運糧可謂天授吾也若敗辛巖璞等自潰彼衆我寡宜以死戰戰而不捷當無匹馬得還宜厲爾戈矛竭汝智力衆咸奮於是率騎三萬襲巖於沃千嶺敗之璞軍遂潰死者二萬

人面縛歸罪駿曰孤之罪也將軍何辱皆赦之

張祚自稱涼州牧遣其將和昊率衆伐驪軒戎於南山
大敗而還祚宗人張瓘時鎮抱罕祚惡其彊遣其將易
揣張瑄率步騎萬三千以襲之時張掖人王鸞頗知神
道言於祚曰軍出不復還涼國將有不利矣祚大怒以
鸞妖言阻衆斬之以徇三軍及發鸞臨刑曰我死不二
十日軍必敗後果為瓘所敗

張天錫為涼州牧時羌廡岐自稱益州刺史率畧得四

千家背苻堅就李儼天錫自往討之儼大敗入城固守
遣子純求救於苻堅堅使其將王猛救之天錫敗績死
者十二三晉太元元年苻堅遣其將苟萇毛當梁熙姚
萇來寇天錫率萬人頓金昌城龍驤將軍馬達率萬人
逆萇等因請降兵人散走征東常據中錄事席劂皆戰
死司兵趙充哲與萇苦戰又死中衛將軍史景亦沒於
陣天錫大懼出城自戰城內又反天錫窘逼降於萇等
前趙劉聰僭即帝位以劉曜為雍州牧據長安安定太

守賈疋及諸氏羌皆送質任雍州刺史麴特新平太守竺恢固守不降護軍麴允頻陽令梁肅自京兆南山將奔安定遇疋任子於陰密擁還臨涇推疋為平南將軍率衆五萬攻曜於長安扶風太守梁綜及麴時竺恢等亦率衆十萬會之曜遣劉雅趙染來拒敗績而還曜又盡長安銳卒與諸軍戰於黃丘曜衆大敗聰又使劉粲劉曜攻劉琨於晉陽晉陽降粲琨與左右數十騎攜其妻子奔於趙郡之亭頭遂如常山告敗於猗盧且乞師

猗盧遣子日利孫賓六須及將軍衛雄姬澹等率衆數萬攻晉陽琨收散卒千餘為之鄉導猗盧率衆六萬至於狼猛曜及賓六須戰於汾東曜墜馬中流夫身被七創乃入晉陽夜與劉粲等掠百姓踰蒙山遁歸猗盧率騎追之戰於藍谷粲敗績斬其征虜邢延獲其鎮北劉豐猗盧戍之而還

劉曜僭即帝位遣其將劉岳攻石勒將石生於金墉石季龍率步騎四萬入自成臯關岳陳兵以待之戰於維

西岳師敗績岳中流矢退保石梁季龍遂塹柵列圍遏絕內外曜親率軍援岳季龍率騎三萬來拒曜次於金谷無故大驚軍中潰散乃退如澠池夜中又驚士卒奔潰遂歸長安季龍執劉岳及其將王騰等八十餘人并氐羌三千餘人送於襄國坑士卒一萬六千曜自至澠池素服郊哭七日乃入城其後曜攻石生於金墉聞季龍進據石門續知石勒自率大衆已濟始議增滎陽戍杜黃馬關俄而雒水候者與勒前鋒交戰擒羯送之曜

問曰大胡自來耶其衆大小復何如羯曰大胡自來軍
盛不可當也曜色變使攝金墉之圍陳於洛西南北十
餘里曜少而淫酒末年尤甚勒至曜將戰飲酒數斗嘗
乘赤馬無故跼頓乃乘小馬比出復飲酒斗餘至於西
陽門搗陣就平勒將石堪因而乘之師遂大潰曜昏醉
奔退馬陷石渠墜於水上被槍十餘通中者三為堪所
執送於勒所

後趙石勒初僭稱趙王遣將孔萇攻陷文鴛十餘營萇

不設備，鴛夜擊之大敗而歸。其後劉曜敗石季龍子高
候，遂圍雒陽。勒滎陽太守尹矩、野王太守張進等皆降。
之襄國。大震乃僭即帝位。秦州休屠王羌叛於勒刺史
臨深，遣司馬管光帥州軍討之。為羌所敗。隴右大擾，氏
羌悉叛。

石季龍僭稱天王，以西平張伏都為都督，征討諸軍事。
帥步騎三萬擊涼州。既渡河，與張駿將謝艾大戰於河
西。伏都敗績，及僭即帝位。涼州戍卒高力、梁犢等起兵。

東還犢自稱晉征東大將軍率衆攻陷下辨逼張茂為
大都督大司馬載以輅車安西劉寧自安定擊之大敗
而還秦雍間城戍無不摧陷斬二千石長史長驅而東
高力等皆多力善射一當十餘人雖無兵甲所在掠百
姓大斧施一丈柯攻戰若神所向皆潰戍卒皆隨之比
至長安衆已十萬其樂平王石苞時鎮長安盡銳拒之
一戰而敗犢遂東出潼關進如雒川季龍以李農為大
都督行大將軍事統衛軍張賀度征西張良征虜石閔

等率步騎十萬討之戰於新安農師不利又戰於雒陽農師大敗乃退壁成臯

冉閔僭即帝位攻石祗於襄國祗遣使詣慕容儁姚弋仲以乞師會石琨自冀州援祗弋仲復遣其子襄率騎三萬八千至自馮頭儁遣將軍悅綰率甲卒三萬自龍城三方勁卒合十餘萬閔遣車騎胡睦拒襄於長蘆將軍孫威候琨於黃丘皆為敵所敗士卒畧盡睦威單騎而還琨等軍且至閔盡衆出戰姚襄悅綰石琨等三面攻

之祗衝其後閔師大敗閔潛於襄國行宮與十餘騎奔鄴降胡栗持康等執冉裔及左僕射劉琦等送於祗盡殺之司空石璞尚書令徐機車騎胡睦侍中李絳中書監盧諶少府王鬱尚書劉欽劉休等及諸將士死者十餘萬人

前燕慕容暉僭即帝位晉南陽督護趙弘以宛降於暉暉遣其南中郎將趙盤自魯陽戍宛比至晉右將軍桓豁攻宛拔之趙盤退奔魯陽豁遣輕騎追盤及於雒城

大戰大敗之執盤戍宛而歸其後晉大司馬桓溫江州
刺史桓冲豫州刺史袁真率衆五萬伐暉前兖州刺史
孫元起兵應之溫部將檀玄攻胡睦執暉寧東慕容忠
暉遣其將慕容厲與溫戰於黃墟厲師大敗單馬奔還
高平太守徐翻以郡歸順溫前鋒朱序又破暉將傅顏
於林渚苻堅又使其將王猛楊安率衆伐暉猛攻壺關
安攻晉陽暉使慕容評率中外精卒四十餘萬拒之與
猛戰於潞州評師大敗死者五萬餘人評等單騎遁還

猛遂長驅至鄴堅復率衆十萬會猛攻暉散騎侍郎徐蔚等率扶餘高句麗及上黨質子五百餘人夜開城門以納堅軍暉與評等數十騎奔於昌黎堅遣郭慶追及暉於高陽縛送於堅

前秦苻堅僭稱天王時苻雙據上邽苻柳據蒲坂叛於堅苻庾據陝城苻武據安定並應之將共伐長安堅遣後禁將軍楊成世左將軍毛嵩等討雙武為其所敗末年遣征南苻融驃騎張蚝撫軍苻方衛軍梁成平南慕容

暉冠軍慕容垂率步騎二十五萬為前鋒堅發長安戍卒六十餘萬騎二十七萬前後千里旗鼓相望晉遣都督謝石徐州刺史謝玄豫州刺史桓伊輔國謝琰等水陸七萬相繼拒融去雒澗二十五里憚梁成不敢進龍驤將軍劉牢之率勁卒五千夜襲城壘尅之斬成及王顯王詠等十將士卒死者萬五千謝石等以既敗梁成水陸繼進堅與苻融登城而望王師見部陣齊整將士精銳又北望八公山上草木皆類人形時張蚝敗謝石

於淝南謝玄謝琰勒卒數萬陣以待之耗乃退列陣逼
淝水王師不得渡遣使謂融曰君懸軍深入置陣逼水
此持久之計豈欲戰者乎若小退師令將士周旋僕與
君公緩轡而觀之不亦美乎融於是麾軍却陣欲因其
濟水覆而取之軍遂奔退制之不可止融馳騎畧陣馬
倒被殺軍遂大敗王師乘勝追擊至於青岡死者相枕
堅為流矢所中單騎遁還於淮北飢甚人有進壺殮豚
髀者堅食之悅曰昔公孫豆粥何以加也命賜帛十疋

繇十斤辭曰臣聞白龍厭天池之樂而見困豫且陛下目所覩也耳所聞也今蒙塵之難豈在天乎且妄施不為惠妄受不為忠陛下臣之父母也安有子養而求報哉弗顧而退堅大慙顧謂其夫人張氏曰朕若用朝臣之言豈見今日之事耶當何面目復臨天下乎潛然流涕而去聞風聲鶴唳皆謂晉師之至堅還長安後為慕容冲所逼冲率衆登城堅身貫甲冑率戰拒之飛矢滿身流血被體三輔人為冲所畧者咸遣使告堅請放火以

為內應堅遣騎七百應之而冲營放火者為風焰所燒
其能免者十一二城中有書曰古符傳賈錄載帝出五
將久長得先是人謠曰堅入五將山長得堅大信之告
其太子宏曰朕如此言天或導余今留汝兼總戎政勿
與賊爭利吾當出隴收兵運糧以給汝天其或者正訓
予也於是遣衛將軍定楊擊冲於城西為冲所擒堅彌
懼付宏以後事將中山公說張夫人率騎數百出如五
將宣告州郡期以孟冬救長安宏等母妻宗室男女數

千騎出奔百僚逃散慕容冲入據長安縱兵大掠死者不可勝計堅至五將山為姚萇將吳忠所執苻丕僭即帝位於晉陽及進據平陽遣將王永及苻纂攻慕容永於襄陵王永大敗及前鋒都督俱石子皆死之初苻纂之奔丕也部下壯士三千餘丕猜而忌之及永之敗懼為纂所殺率騎數千南奔東垣晉揚威將軍馮該自陝要擊敗之斬丕首執其太子寧長樂王壽送於京師苻登僭即帝位遣騎大將軍竇衝攻姚萇與萇戰於汧

東為萇所敗登征虜馮翊太守蘭犢率衆二萬自潁陽入於和寧與苻纂首尾將圍長安纂弟師奴殺纂自立為秦公蘭犢絕之皆為萇所敗其後登以尚書苻碩原為前禁將軍滅羌校尉戍平涼登進據苟頭原以逼安定萇率騎三萬夜襲大界營陷之殺登妻毛氏及其子弁尚擒名將數十人驅掠男女五萬餘口而去登收合餘兵退據胡空堡其後進攻新平萇率衆救之登引退復攻安定為萇所敗據路承堡及姚萇死登聞之喜曰

姚興小兒吾將折杖以笞之於是大赦盡衆而東攻屠
各姚奴帛蒲二堡尅之自甘泉向關中興追登不及數
十里登從六陌趣廢橋興將尹緯據橋以待之登爭水
不得衆渴死者十二三與緯大戰為緯所敗其夜衆潰
登單馬奔雍乞伏乾歸遣騎二萬救登登引軍出迎與
興戰於山南為興所敗被殺

後秦姚興僭即帝位仇池公楊盛叛擾祁山遣建威趙
琨率騎五千為前鋒立節楊伯壽統步卒繼之前將軍

姚恢左將軍姚文宗入自鷲峽鎮西秦州刺史姚嵩入
羊頭陝右衛胡翼度從陰密出自汧城討盛興將輕騎
五千自雍赴之盛率衆與琨相持伯壽畏懦弗進琨衆
寡不敵為盛所敗興斬伯壽而還

姚泓僭襲父位仇池公楊盛攻陷祁山執建節王摠遂
逼秦州泓遣後將軍姚平救之盛引退姚嵩與平追盛
及於竹嶺姚讚率隴西太守姚秦都雒陽太守王煥以
禁兵赴之讚至清水嵩為盛所敗嵩及秦都王煥皆戰

死其後晉太尉劉裕摠大軍伐泓王師至成臯征南姚
洸時鎮雒陽馳使請救泓遣越騎校尉閻生率騎三千
以赴之武衛姚益男將步卒一萬助守雒陽又遣征東
并州牧姚懿南屯陝津為之聲援洸遣部將趙玄率精
兵千餘南守柏谷隰廣武石無諱東戍鞏城以拒王師
會陽城及成臯滎陽武牢諸城悉降晉將檀道濟等長
驅而至無諱至石關奔還玄與晉將毛德祖戰於柏谷
以衆寡而敗姚禹踰城奔於王師道濟進至雒陽洸懼

遂降其後泓遣輔國胡翼度據東原武衛姚鸞營於大路與晉軍相接晉將沈林子簡精銳銜枚夜襲之鸞衆潰戰死士卒死者九千餘人姚讚屯於河上讚為林子所敗單馬奔定城姚紹遣左長史姚洽及姚黑蠡等率騎三千屯於河北之九原林子率衆八千要洽於河上洽戰死衆皆沒紹聞洽等敗嘔血而死林子率精兵萬餘越山開道會沈田子於青泥將攻姚柳泓使姚裕率步騎八千拒之泓躬將大衆繼發裕為田子所敗鎮北

姚疆率郡人數千與姚難陣於涇上以拒晉將王鎮惡遣毛德祖擊疆大敗疆戰死難遁還長安劉裕進據鄭城泓使姚裕及尚書龐純屯兵營中姚洸屯於澧西尚書姚白瓜徙四軍雜戶入長安姚丕守渭橋胡翼度屯石積姚讚屯霸東泓軍於逍遙園夾渭進兵破苻丕於渭橋泓自逍遙園赴之逼水地狹因丕之敗遂相踐而退姚謔及前軍姚烈左衛姚寶安散騎王帛建武姚進揚威姚蚝尚書左丞孫玄等皆死於陣泓單馬還宮鎮

惡入自平朔門泓與姚裕等數百騎出奔於石橋因將
妻子詣壘門而降

後蜀李特僭稱益州牧攻成都益州刺史羅尚據城自守晉
遣荊州刺史宋岱建平太守孫阜救尚阜已次德陽特
遣蕩督李璜助任臧拒阜尚遣大衆掩襲特營連戰二
日衆少不敵特軍大敗收合餘卒引趣新繁尚軍引退
特復追之轉戰三十餘里尚出大軍逆戰特軍敗績斬
特傳首雒陽

李雄僭即帝位遣太傅李驥征越雋既降之驥進軍繇小會攻寧州刺史王遜遜使其將姚岳悉衆拒戰驥軍不利又遇霖雨驥引軍還爭濟瀘水士衆多死又遣中領軍李瑒及將軍樂次費他李乾李稚等討楊難敵繇白水橋攻下辨征東李壽督瑒弟珩攻陰平難敵遣軍拒之壽不得進而瑒稚長驅至武街難敵遣兵斷其歸道四面攻之獲瑒稚死者數千人

後涼呂隆僭即天王位魏安人焦朗遣使說姚興將姚

碩德伐之碩德遂率衆至姑臧隆遣弟輔國呂超出戰大敗遁還隆收集離散嬰城固守於是羣臣表求與姚興通好隆從之乃請降於碩德

後燕慕容垂僭即帝位遣其太子寶及慕容農慕容麟等率衆八萬伐魏慕容德慕容紹以步騎一萬八千為寶後繼魏聞寶將至徙往河西寶進師臨河懼不敢濟還次參合忽有大風黑氣狀若隄防或高或下臨覆軍上沙門支曇猛言於寶曰風氣暴迅魏軍將至之候宜

遣兵禦之寶笑而不納曇猛固以為言乃遣麟率騎遊獵俄而黃霧四塞日月晦冥是夜魏師大至三軍奔潰寶與德等數千騎奔免士衆還者十一二紹死之

慕容寶襲偽位魏伐并州驃騎李農逆戰敗績還於晉陽司馬慕容嵩閉門拒之農率騎數千奔中山行及潞州為魏追軍所及餘騎盡沒單馬遁還其後寶聞魏有內難乃盡衆出拒步卒十二萬騎三萬七千次於曲陽柏津魏軍進至新梁寶憚魏師之銳乃遣征北隆夜襲

魏軍敗績而還軍方軌而至對營相持上下亮懼三軍
奪氣農麟勸寶還中山乃引歸魏軍追擊之寶農等棄
大軍率騎二萬奔還時大風雪凍死者相枕於道寶恐
為魏軍所及命去袍仗戎器寸刃無返

西秦乞伏乾歸僭稱河南王姚興將姚碩德率衆五萬伐之
入自南安峽乾歸次於隴西以拒碩德興潛師繼發乾
歸聞興將至遣其衛軍慕容允率中軍二萬遷於柏陽
鎮軍羅敷將外軍四萬遷於候辰谷乾歸自率輕騎數

千候興軍勢俄而大風昏霧遂與中軍相失為興追騎所逼入於外軍旦而交戰為興所敗乾歸遁還苑川遂走金城率騎數百馳至允吾秃髮利鹿孤處之於晉興乾歸後懼為利鹿孤所害遂奔長安

南涼秃髮傉檀僭稱河西王徵集戎夏之兵五萬餘人大閱於方亭遂伐沮渠蒙遜入西陝蒙遜率衆來拒戰於均石為蒙遜所敗傉檀率騎二萬運穀四萬石以給西郡蒙遜攻西郡陷之其後傉檀又與赫連勃勃戰於

陽武為勃勃所敗將佐死者十餘人偃檀與數騎奔南山幾為追騎所得蒙遜進圍姑臧百姓懲東苑之戮悉皆驚散疊掘麥田車蓋諸部盡降於蒙遜偃檀遣使請和蒙遜許之乃遣司隸校尉敬歸及子他為質歸至胡坑逃還他為追兵所執蒙遜徙其衆八千餘戶而歸吐谷渾樹劓干率衆來伐偃檀遣其太子武臺距之為劓干所敗偃檀又將伐蒙遜邯川護軍孟愷諫曰蒙遜初并姑臧凶勢甚盛宜固守伺隙不可妄動不從五道俱

進至番禾苕藿掠五千餘戶其將屈右進曰陛下轉鬪
千里前無完陣徙戶資財盈溢衢路宜倍道旋師早度
峻險蒙遜善於用兵士衆習戰若輕車卒至出吾慮表
大敵外逼徙戶內攻危之道也衛尉伊力延曰我軍勢
方盛將士勇氣固倍彼徒我騎勢不相及若倍道旋師
必捐棄資財示人以弱非計也屈右出而告其諸弟曰
吾言不用天命也此吾兄弟死地俄而昏霧風雨蒙遜
軍大至偃檀敗績而還赫連勃勃求婚於偃檀偃檀弗

許勃勃怒率騎二萬來伐殺傷萬餘人倭檀率衆追之
其將焦朗謂倭檀曰勃勃天姿雄鷲御軍齊肅未可輕
也今因抄掠之資率恩歸之士人自為戰難與爭鋒不
如從溫圍北渡趣萬斛堆阻水結營制其咽喉百戰百
勝之術也倭檀將賀連怒曰勃勃以死亡之餘率烏合
之衆犯順結禍幸有大功今牛羊塞路財寶若山窘弊
之餘人懷貪競不能督厲士衆以抗我也我以大軍臨
之必土傾魚潰今引軍避之示敵以弱我衆氣銳宜在

速追偃檀曰吾追計決矣敢諫者斬勃勃聞而大喜乃於陽武下陝鑿陵埋車以塞路偃檀遣善射者射之中勃勃左臂勃勃乃勒衆逆擊大破之追奔八十餘里殺傷萬計斬其大將十餘人以為京觀號鬪體臺

南燕慕容超僭即帝位晉將劉裕率師將討之師次東莞超遣其左軍段暉輔國賀刺盧等六將步騎五萬進據臨朐俄而晉師度峴超懼率卒四萬就暉等於臨朐謂公孫五樓曰宜進據川源晉軍至而失水亦不能戰

矣五樓馳騎據之晉前驅將軍孟龍符已至川源五樓
戰敗而返晉將檀韶率銳卒攻破臨朐超大懼單騎奔
段暉於城南暉衆又戰敗超又奔還廣固使郭內人入
保小城未幾晉師圍四面皆合江南繼兵相尋而至超
尚書悅壽開門以納王師超與左右數十騎出亡為晉
軍所執


前蜀王建僭帝位於成都梁將劉知俊奔鳳翔李茂貞
以為大將稍侵建之東川建出兵拒戰為知俊所敗興

鳳皆沒焉

江南李景僭襲父位周世宗顯德三年春親征淮甸大敗淮寇於正陽遂進攻壽州四年春世宗再駕南征三月大敗江南援軍於紫金山尋降下壽州是年十月世宗復臨淮甸連下濠泗二郡進攻楚州五年春拔之景乃上表以廬舒蘄黃等四州來上乞畫江為界

河東劉崇僭稱帝位遣兵三千餘衆寇府州為節度使折德宸所破其所部竒嵐軍為德宸所取周世宗嗣位

崇乞師於虜與虜將楊衮合勢大舉來迫潞州顯德元
年三月世宗親征與崇戰於高平大敗之崇與親騎十
數人踰山而遁中夜迷懵不知所適劫村民使為鄉導
誤趨晉州路行百餘里方覺崇怒殺鄉導者得他路而
去距太原一舍其子承鈞夜以兵百人迎之而入及周
師至城下崇氣懾自固閉壘不出月餘世宗乃旋軍



冊府元龜卷二百三十四

欽定四庫全書

子部
冊府元龜卷二百三十五
七五

詳校官中書_臣王鵬

員外郎_臣牛稔文覆勘

總校官庶吉士_臣何思鈞

校對官學正_臣湯垣

謄錄舉人_臣蔡枝華

欽定四庫全書

冊府元龜卷二百三十五

宗 王欽若等 撰

列國君部

總序

易之比象曰先王以建萬國親諸侯自黃帝制城畫野
得百里之國萬區帝堯在位協和萬邦禹會塗山執玉
萬國以至於桀存者三千商氏之起大明憲法立公侯
伯子男凡五等之爵其分土則公侯地方百里伯七十

里子男五十里為三等之制其不能五十里者附於諸侯曰附庸九州之地各方千里州建二百一十國天子之縣內建九十三國而附庸不與焉千里之外設方伯五國以為屬屬有長十國以為連連有帥三十國以為卒卒有正二百一十國以為州州有伯八州八伯五十六正百六十八帥三百三十六長八伯各以其屬屬於天子之老二人分天下以為左右曰二伯其縣內諸侯選賢以置於位食其國祿而不得世外諸侯以功而封象

賢繼立周承商制所封凡八百國同姓五十有餘所以
親親賢賢褒美功德播於雅頌闕諸盛衰深根固本為
不可拔者也幽平之後日以陵替分為二周天下謂之
共主諸侯雖强大猶不敢窺周鼎蓋枝葉相持藩垣外
固繇制法於在昔得長世之善經而使之然也故仲尼
之刪定典籍約史記以脩春秋丘明受經垂諸傳述其
槩見之大國者周公之子伯禽封曲阜為魯侯武王之
子唐叔虞封太原為晉侯文王之子四人康叔封朝歌

為衛侯度封上蔡為蔡侯又振鐸之後封陶丘為曹伯
繡之後封滕為滕侯宣王母弟友封鄭為鄭伯召公奭
之後封薊為北燕伯仲雍之孫周章封吳為吳子太公
望之後封營丘為齊侯有熊之曾孫熊繹封丹陽為楚
子非子之後封岐之地為秦伯紂兄微子封商丘為宋
公胡公封陳為陳侯伯夷之後封許為許男少昊之後
封莒為莒子顓頊之後封邾為邾子又別封邾侯之後
居郕為小邾子夏禹之後封杞為杞伯少康之後封會

稽為越子凡大國二十其薛伯虞公虢公紀侯邢侯息
侯邴伯鄧侯賈伯隨侯梁伯徐子郟子沈子邳子唐侯
胡子邠子南燕伯宿男夔子巴子州公宗子郕子穀伯
荀侯賴子譚子滑伯舒子弦子須句子頓子麋子郟子
黎侯偃陽子鍾吾子凡三十九國又紀芮東虢蕭萊羅
夷管凡八國亡其爵其小國凡四十七焉又有申共向
極戴魏遂鄆黃貳軫州絞六葛於餘丘蓼牟權霍耿陽
江冀舒蓼巢道柏厲微項箕崇英顓臾甯雍任鄆聃邾

畢黎昆吾茅應都寒鄆蔣根牟胙郇瑕有莘闕鞏介斟
灌偃過庸邾莒鳩焦鄆邾有禹庸斟尋豳戈韓鑄楊邳
觀褒妣緡豸韋岐仍商奄駘房大庭亳桐密須窮桑封
父甲父凡九十四國但存爵號而無世次其間亦有虞
夏商周之所封皆春秋之攸著者也當其各受分土保
有疆域歲時述職率遵王命洎周德微弱國綱寢弛而
猶五伯更起迭主夏盟尊獎徵討存亡繼絕政令有所
稟小陋賴其庇既而霸道交喪庶邦力攻上有虛位之

耻下無方伯之勢強弱相吞莫知能救春秋之後其存者魯衛齊楚宋鄭燕秦趙魏韓中山凡十二國焉其後楚考烈王滅魯頃公遷於下遂為家人而魯絕祀秦徙衛元君於野王而并其地為東郡不得列於諸侯齊湣王與楚伐宋殺王偃滅宋而三分其地韓哀侯滅鄭而併其國魏文侯使樂羊拔中山凡亡五國其存者秦楚燕魏韓齊趙七國而已終為秦所併焉今之所紀自春秋以來列國君臣善敗之跡訖於七國為列國君部凡

四十門

建國

錫命

奉先

建國

古者並建諸侯以承天子所以尊宗廟重社稷也自黃
帝之畫野分州得百里之國萬區蓋封建之舊制矣然
而史氏闕紀莫得而詳爰及姬氏周監於二代乃設五
等之爵為九服之辨列樹勲戚作深根固本之計重之
以分器祚之以世族大者著乎賜履小亦僅乎一同藩

屏輔衛於是乎在至於建侯裂壤以申畫郊圻燾土立疆而肇建宗祀職方之志斯著輿地之圖足徵故始封遷卜之諸侯以詳述之矣

吳太伯之犇荆蠻自號勾吳及周武王克殷求太伯仲雍之後得周章已君吳因而封之乃封周章弟虞仲於周之北故夏虛

在河東大陽縣

是為虞仲列為諸侯

魯周公旦武王弟也周公佐武王破殷封旦於少昊之虛曲阜是為魯公不就封周公卒子伯禽因以前受封

是為魯公

燕召公奭與周同姓姬氏周武王之滅紂封召公於

北燕

有南燕故
云北燕

居廣陽薊縣

管叔鮮周文王子而武王弟也武王克殷紂平天下封
叔鮮於管今滎陽京縣東北管城

蔡叔度周文王子而武王弟也武王克殷平天下封叔
度於蔡初居上蔡蔡平侯徙新蔡

並汝南
縣也

後二世殺上

蔡

衛康叔名封周武王同母少弟成王伐殷殺武庚祿父
管叔放蔡叔以武庚餘民封康叔為衛君居河淇間
故商墟衛成公自楚丘徙濮陽

鄆故國今滎陽密縣東北鄆城

唐叔虞者周武王子成王弟成王封叔虞於唐唐在河
汾之東方百里故曰唐叔虞都於冀

世本曰居鄂宋志
曰鄂地今在大夏

昭侯封文侯弟成師於曲沃是為曲沃桓叔武公後併
晉地而有之

鄭桓公友宣王庶弟

年表云母弟

宣王立二十二年初封於

鄭

地里志云京兆鄭桓公封於此

問太史伯曰王室多故予安逃死乎對曰

獨雒之東土河濟之南可居桓公卒言王東徙其民雒

東而虢鄆果獻十邑

十邑謂虢鄆駘蔽補丹依縣歷莘

竟國之

今河西新鄭也

曹姬姓文王子叔振鐸之後武王封之陶丘

今濟陰定陶

滕姬姓周文王子叔繡之後武王封之居滕今沛郡公

丘縣

虢姬姓文王弟虢仲之後治今弘農陝縣

應周武王弟所封今在潁川城父應鄉

又左傳云邗晉應韓武之穆也

此則應為武王之子

魏姬姓國

史不載所封為誰

其地虞舜夏禹所都之域在古冀

州雷首之北析城之西南沈河曲北涉汾水

後為晉所滅

其

後晉獻公滅魏以封畢萬萬從其國為魏氏文公時為

列大夫魏悼子徙治霍晉悼公時魏昭子徙治安邑其

後惠王徙治大梁

畢萬之先畢公高與周同姓武王伐紂高封於畢畢在長安縣西

耿姬姓國

平陽皮氏縣東南有耿鄉為晉所滅

趙氏之先造父幸於周繆

王賜以趙城繇此為趙氏叔帶去周事晉始建趙氏於

晉國

地理志河東永安故地周穆王封造父之趙城

晉獻公滅耿以賜趙夙至

浣自耿徙中牟至敬侯始都邯鄲

韓氏之先與周同姓其後裔事晉封於韓原周末韓景

侯自新鄭徙陽翟

齊太公望其先祖虞夏之際封於呂

呂在南陽宛縣西

或封於

申姓姜氏佐周武王伐商封於齊營丘其後獻公因徙

薄姑都治臨淄田完初自陳奔齊始食采於田故為田

氏其後以田常彊盛割齊自安平土以東至瑯琊自為封邑至田和并有齊國為諸侯

楚熊繹羊氏周成王舉文武勤勞後初封於楚蠻以子男之田居丹陽

在南郡枝江縣

其後文王熊賁始都郢襄王橫

為秦所敗東北保於陳城考烈王東徙都壽春

秦非子初居犬丘周孝王分土為附庸邑之秦

今天水隴西縣

秦亭是後世秦襄公以兵送周平王徙雒邑平王賜之者也

岐以西之地於是始得國公初居雍城獻公城櫟陽而

都之

今萬年
是也

孝公十二年作為咸陽築冀闕徙都之

祀夏禹之後周武王克殷紂求禹之後得東樓公封之於杞杞今陳留雍丘

越其先夏少康之庶子封於會稽以奉守禹之祀

陳胡公滿者虞帝舜之後姓媯氏周武王克殷乃求舜後得媯滿封之於陳

宋微子啟者殷帝乙之首子紂之庶兄也成王誅武庚殺管叔放蔡叔乃命微子啟代殷後國於宋都商丘大

辰之墟今梁國睢陽

許姜姓堯四岳伯夷之後武王封其苗裔文叔於許今
潁川許昌是靈公徙葉悼公遷於夷一名城父又居析
一名白羽許男斯處容城

莒嬴姓少昊之後武王封茲輿於莒初都計斤後徙莒

今城陽莒縣

計斤今春秋所謂介根

邾國曹姓顓頊之後武王封其苗裔邾俠為附庸居邾

邾今魯國鄰縣也

文公徙於繹

小邾邾俠後夷父顏有功其子友別封附庸居東平昌
盧東北郛城

共國汲郡共縣

宿國東平無鹽縣任姓

中山國南陽宛縣

夷國城陽莊武縣所治夷女城

向國龍元縣東向城姜姓炎帝後

南燕國東郡燕縣姬姓黃帝後

凡國汲郡共縣東南凡城

戴國陳留外黃縣東南戴城

息國汝陰新息縣故息國東徙故加新

郟國濟陰城武縣東南北郟城

芮國漢之馮翊臨晉魏之河東河北縣芮鄉

郟國東海郟縣盈姓

州國東莞淳于縣又州國南郡華容縣東南州陵城

穀國南陽筑陽縣穀城

巴國巴郡江州縣

廖國儀陽棗陽縣東南湖陽城

後廖國
亦作風

羅國南郡宜城縣西山後徙南郡枝江縣

牟國泰山牟縣魯附庸

葛國梁郡寧陵縣東北葛鄉

譚國濟南平陵縣西南譚城

蕭國沛郡蕭縣故蕭叔國宋別封附庸

遂國濟北虵丘縣東北遂鄉

滑國都費在河南緱氏縣

權國南郡當陽縣東南權城

鄆國東平無鹽縣東北鄆城

霍國平陽永安縣東北霍太山

江國汝南安陽江亭

冀國平陽皮氏縣東北冀亭

弦國弋陽軹縣東南弦亭

一云在江夏軹

道國汝南陽安縣南道亭

栢國汝南西平縣栢亭

微國東平壽張縣西北微鄉

繒國琅邪繒縣禹後

厲國儀陽遂陽縣北厲鄉

厲讀曰賴

項國汝陰項縣

密國滎陽密縣姬姓之國也

顏師古謂此密即春秋僖六年圍商密者也詩所云

密人即左傳所謂密須之鼓者也在安定陰密

任國東平任城縣

須句國東平須昌縣西北句城風姓太昊後

潁史國泰山南陽縣東北潁史城

頓國汝南南頓縣頓子姬姓頓迫於陳其後南徙故號
南頓

雍國河內山陽西雍城

畢國京兆長安縣西北

豐國始平鄠縣東豐邑臺

邢國河內野王縣西北邢城姬姓

應國襄城城父縣西南應城

蔣國弋陽期思縣蔣鄉城

茅國高平昌邑縣西北茅鄉城

胙國東郡燕縣東北胙城

夔國建平秭歸縣

介國城陽黔陬縣

焦國弘農陝縣故焦城

鄧國南郡鄧縣

鄧侯國

鄆國南陽鄆縣聚

古鄆國

歸國南郡秭歸歸鄉

邳國南郡軹東南邳城

鄆國南郡雲杜鄆城

廬國廬江郡故廬子國

下邳國東海郡下邳邳初在薛其後徙師故曰下邳

鍾離國九江郡古鍾離子邑

過當國樂安壽光過鄉

州萊國沛郡下蔡

淳于國北海淳于

鼓國鉅鹿郡下曲陽鼓聚故翟鼓子國

肥國泰山肥城

又云淄川劇故肥國今肥亭是

肥國鉅鹿郡下曲陽西

南肥累城

古肥國白狄別種後奔燕封於遼西郡肥如

鑄國濟北宛丘鑄鄉堯後周武王所封

紀國北海劇紀亭

棠國北海郡即墨棠鄉

夷國北海郡壯武

萊國東萊郡

郟國東海郡開陽

徐國臨淮郡徐盈姓

無終國右北平無終

朝鮮國樂浪郡朝鮮周武王封箕子

鮮虞國中山國新市

陽國城陽都陽城

邳國梁國穀熟邳亭

沈國汝南平輿沈亭

蓼國廬江蓼阜繇後

六國廬江六縣阜繇後姬姓

巢國廬江六縣居巢城

根牟國瑯邪陽都縣東牟鄉城

唐國義陽安昌縣東南上唐鄉

唐國又在太原晉陽縣

黎國上黨壺關縣黎亭

郟國河東解縣西北郟城

禹國平原禹縣

斟國北海郡斟禹後

斟灌國樂安壽光縣東南灌亭禹後

斟尋國北海郡平壽縣東南斟亭禹後

過國東南萊掖縣北過鄉

戈國宋鄭之間有戈邑

偃陽國彭城傅陽縣妘姓

邾國任城亢父縣詩亭

邾亦作詩

杜國京兆杜縣

楊國平陽楊縣

豳國新平漆縣東北邠城

觀國頓丘衛縣妘姓

黃國汝南弋陽北黃城

房國汝南吳房本房子國楚靈王遷房於楚後封吳闔

閭弟夫髡故曰吳房

胡國汝陽縣西北胡城

黎國汝南魏郡黎陽縣

或云東夷國又漢書地理志黎侯國上黨壺關

密須國安定陰密

甲父國高平昌邑縣東南甲父亭

梁國伯翳之後與秦同祖秦取梁改曰夏陽今馮翊夏陽是也

鍾吾國在東海司吾

左傳曰吾執鍾吾子

桐國廬江舒縣西南桐鄉

荀國河東荀城

古荀國以下並古國

潞國上黨潞

即潞子國

虢國滎陽河南虢亭

程國河南雒陽上程聚

古程國重黎之後伯休甫之國關中又有程聚文王居程徙都

豐故名為上程

鞏國河南鞏縣

即鞏伯國

豕韋國東郡白馬韋鄉

古豕韋氏之國

塗山國九江當塗禹所娶塗山國有禹墟

寒國北海郡平壽寒亭寒浞所封

令支國遼支令西孤竹城故伯夷國

防風國吳興武康

奚仲國魯國薛後遷於邳陽

彭祖國彭城

奄國魯古奄國

錫命

天子建德昭乎利用諸侯正封是為述職稽茂勲之允格故殊命之乃錫粵若厲階斯作得專四履之征外虞以寧始重一卣之錫其或紹休前烈厥政用舉納忠王室多儀克享肇啓公侯之士綽著兵戰之績繇是申之豐報昭其寵數嘉言淑令藹諸簡冊至於博選盛族欽成姻好茲率厥典恢纂舊服非有私於名器實攸賴其夾輔者爾

齊太公周成王時管蔡作亂淮夷叛周乃使召康公召公

夔命太公曰東至海西至河南至穆陵北至無棣

是皆太公

始受封土地疆境所至也

五侯九伯實得征之

五等諸侯九州之繇伯皆得征討其罪繇

此得征伐為大國

晉文侯周平王錫以秬鬯圭瓚

以圭為杓柄謂之圭瓚

作文侯之

命

幽王為犬戎所殺平王立而東遷維邑晉文侯迎逆安定之故錫命焉

王若曰父義和

順其功而命之文侯同姓故稱曰父義和字也

丕顯文武克慎明德

大明乎文王武王之

道能詳審顯用有德

昭升於上敷聞在下惟時上帝集厥命於文

王

言文王聖德明升於天而布聞在下民惟以是故上天集成其王命德流子孫

亦惟先正克

左右昭事厥辟

言君既聖明亦惟先正官賢臣能左右明事其君所以然

越小大謀

猷罔不率從肆先祖懷在位

言文王君聖臣良於小大所謀道德天下無不循從

其化故我後世先祖歸在王位

嗚呼閔予小子嗣造天丕愆

言我小子之遭天大

罪過父死國敗祖業隕墮

殄資澤於下民侵戎我國家純

言周邦喪亂絕其資

用惠澤於下民侵戎傷我國其禍甚大

即我御事罔或者壽俊在厥服予

則罔克

所以遇禍即我治事之臣無有耆宿壽考俊德在其服位我則材劣無能之致

曰惟祖

惟父其伊恤朕躬嗚呼有績予一人永綏在位

王曰同姓諸侯

在我惟祖惟父列者其惟當憂念我身嗚呼能有成功則我一人長安在王位言恃諸侯

父義和汝

克昭乃顯祖

重稱字親之不稱名尊之言汝能明汝顯祖唐叔之道獎之

汝肇刑文

武用會紹乃辟追孝於前文人

言汝今始法文武之道矣當用是道合會繼汝

君以善使追孝於前文德之人汝君平王自謂也繼先祖之志為孝

汝多脩扞我於艱若

汝子嘉

戰功曰多言汝之功多甚脩矣乃扞我於艱難謂救周誅犬戎汝功我所嘉

王曰父

義和其歸視爾師寧爾邦

遣令還晉國其歸視汝衆安汝國內上下

用賚爾

柎鬯一卣

黑黍曰柎釀以鬯草不言主瓚可知卣中罇也當以錫命告其始祖故錫鬯

彤弓

一彤矢百盧弓一盧矢百

彤赤盧黑也諸侯有大功賜弓矢然後專征伐彤弓以講德

習射藏馬四匹

馬供武用四匹曰乘侯伯之賜無常以功大小為度

父往哉柔遠

能邇惠康小民無荒寧

父往歸國哉懷柔遠人必以文德能柔遠者必能柔近然後國

安安小人之道必以順無荒廢人事而自安

簡恤爾都用成爾顯德

當簡核汝所自

治都鄙之人人和政治則汝顯用有德之功成矣不言鄙繇近以及遠

韓侯宣王時錫命尹吉甫作韓奕以美之曰王錫韓侯

淑旂綏章鞞第錯衡玄衮赤舄鈎膺鏤錫鞞鞞淺幟

革金厄

淑善也蛟龍為旂綏大綏也錯衡文衡鏤錫有金鏤其錫也鞞革也鞞鞞中淺虎皮淺毛也

幟覆式也厄烏蠲也鞞第漆鞞以為車蔽今之藩也鈎膺樊纓也眉上曰錫刻金飾之今當盧也條革謂轡以

金為小環往往纏搯之

又曰以先祖受命因時百蠻王錫韓侯其

追其貊奄受北國因其伯

韓侯之先祖武王之子也
因時百蠻長是蠻服之百

國也追貊戎狄國也奄撫也韓侯先祖有功德者受先
王之命封為韓侯為侯伯其州界外接蠻服因得使時
節百蠻貢獻之往來後君微弱用失其業今王以韓侯
先祖之事如是而韓侯賢故於入覲使復其先祖之舊
職錫之蠻服追貊之戎狄令撫柔其所受王畿北面之
國因以其先祖侯伯之事盡予之皆美其為人子孫能
興復先祖
之舊功

楚成王憚即位布德施忠結舊好於諸侯周惠王五年
使人獻天子天子錫胙曰鎮爾南方夷越之亂無侵中

國

齊桓公惠王十年王使召伯廖賜齊侯命

召伯廖王卿士賜命為侯

伯王欽若等曰齊侯桓公也

襄王元年桓公葵丘之會天子使宰孔致胙於桓公

宰孔

宰周公也

曰余一人之命有事於文武使孔致胙且有後命

曰以爾自卑勞謂爾伯舅無下拜

天子稱王官之伯異姓曰伯舅無下拜無

下堂拜賜也

桓公召管子而謀管子對曰為君不君為臣不

臣亂之本也桓公懼出見客曰天威不遠顔咫尺

遠遠顔眉

目之間八寸曰咫

小白余敢承天子之命曰爾無下拜恐隕越

於下以為天子羞遂下拜升受命賞服大輅龍旗九旒

渠門赤旂

大輅諸侯朝服之車謂金輅鈎樊纓九就龍旗九旒也渠門亦旂名建為軍門若今牙門

赤旂大旂諸侯稱順焉

晉惠公襄王二年王使召武公內史過賜晉侯命

召武公周

卿士內史過周大夫諸侯即位天子賜之命圭為瑞王欽若等曰魯僖公十一年也晉侯晉惠也

文公襄王二十年獻楚俘於王駟介百乘徒兵千

駟介四馬

被甲徒兵步卒鄭伯傅王用平禮也

傅相也以周平王享晉文侯仇之禮享晉侯

已

酉王享禮命晉侯宥

既饗又命晉侯助以束帛以將厚意

王命尹氏及王

子虎內史叔興父策命晉侯為侯伯

以策書命晉侯為伯也周禮九命作

伯尹氏王子虎皆王卿士也叔興父大夫也三官命之以寵晉

賜之大輅之服戎輅之

服大輅金輅戎輅戎車二輅各有服

彤弓一彤矢百玃弓一玃矢千

彤赤

弓玃黑弓弓一夫百則夫千弓十矣諸侯賜弓矢然後專征伐

秬鬯一卣

秬黑黍鬯香酒所以降神

名 卣器

虎賁三百人曰王謂叔父敬服王命以綏四國糾

逖王慝

逖遠也有惡於王者糾而遠之

晉侯三辭從命曰重耳敢再拜

稽首奉揚天子之丕顯休命

稽首首至地丕大也休美也

受策以出

魯文公襄王二十六年公即位天王使毛伯來錫公命

毛國伯爵諸侯
為王卿士者

成公八年秋簡王三年也天子使召伯來錫公命

諸侯即位

天子賜以命圭與之合瑞八年乃來緩也天子天王王者之通稱

齊靈公靈王十三年王使劉定公賜齊侯命

將昏於齊故也定公

劉夏位賤以能而使之傳稱誼舉其終

曰昔伯舅太公右我先王股肱周室

師保萬民世胙太師以表東海

胙報也表顯也謂顯封東海以報太師之功

王室之不壞繫伯舅是賴

繫發聲

今余命汝環

環齊靈公名

茲率

舅氏之典纂乃祖考無忝乃舊敬之哉無廢朕命

纂繼也因

昏而加褒顯也傳言
王室不能命有功

越王句踐已平吳乃以兵北渡淮與齊晉諸侯會於徐
州致貢於周元王使人賜句踐胙命為伯

秦孝公十九年顯王二十六年也天子致胙諸侯畢賀
奉先

夫祀者國之大事孝者人之本與邦君敦行史冊垂美
譬諸善政尤為盛烈奉先之誠不匱昭享之義有叙惟
馨之薦豐而且潔非有詔也致美之服章而有量不圖

奢也然後能保其社稷和其民人蓋諸侯之孝也

魯隱公五年九月考仲子之宮初獻六羽

成仲子之宮安其主而祭

之惠公以仲子手文而娶之欲以為夫人諸侯無二嫡蓋隱公成父之志為別立宮也公問羽數故書羽婦人

無諡因姓以名宮

初仲子宮成將萬焉

萬舞也

公問羽數於衆仲

問執羽人

對曰天子用八

八八六

諸侯用六

六六三

大夫

四

四四十

士二

二二四有功賜用樂

夫舞所以節八音而行八

風

八音金石絲竹匏土革木也八風八方之風也以八音之氣播八方之風手之舞之足之蹈之節其制而

叙其情

故自八以下

惟天子得盡物數故以八為列諸侯則不敢用八

公從之於

是初獻六羽始用六佾也

魯惟文王周公廟得用八而他公遂因僭而用之今隱公

特因此婦人之廟詳問衆仲因明大典故言始用六佾

桓公八年五月丁丑蒸

十四年八月壬申御廩災

御廩藏公所親耕以奉乙亥

嘗

既戒日致齋御廩雖災苟不害嘉穀則祭不應廢故書以示法

僖公八年七月禘於太廟用致夫人

禘三年大祭之名太廟周公之廟致

者致新主於廟而列之昭穆夫人姜氏預公能復周公

之宇

也宇居

故魯頌闕宮有佻實實枚枚

闕閉也先妣姜姬之廟孟仲子

曰是祿宮也。恤清淨也。實實廣大也。枚枚，枚，舊。周公之孫，密也。一云閼神也。姜嫄神所依，故廟曰神宮。

莊公之子龍旂承祀六轡耳耳。春秋匪懈，享祀不忒。周

之孫，莊公之子謂僖公也。耳耳，然至盛也。交龍為旂，承祀謂視祭祀也。四馬故六轡，春秋猶言四時忒變。

二十四年二月，晉公子文入于晉，丁未朝于武宮。武公廟

文公二年二月丁丑作僖公主。主者，殷人以栢，周人以栗。三年喪終，則遷入於

廟。傳云過葬十月，而作主書其不時。

宣公八年六月辛巳，有事於太廟，公子遂卒於垂。齊地

壬午，猶繹萬入去籥。繹，明日又祭萬舞名籥管也。猶可止之，辭魯人知卿佐之喪不宜作。

樂而不廢繹
故萬舞去籥

成公三年二月甲子新宮災三日哭

宣公新神主入廟
故謂之新宮書三

日哭善得禮宗廟親之神靈
所憑居而遇災故哀而哭之

十八年晉悼公立正月辛巳朝武宮

武宮曲沃
始命君

襄公十六年晉平公即位烝于曲沃

悼公既葬平公改服曲沃
晉祖廟烝冬祭也

侯五月而葬作主然後烝嘗於廟今晉踰月
葬作主而烝祭傳言晉將有盟會故速葬

昭公元年十二月晉烝

烝冬祭也

十五年二月癸酉禘於武宮

魯武公廟成公立六年復立之叔弓泣事

籥入而卒去樂卒事禮也

大臣卒故為之去樂

定公八年冬從祀先公

從順也先公閔公僖公將正二公之位次所順非一親盡故通

言先公

冊府元龜卷二百三十五